

莆田水利志

地713.1

176

部=1~8

光緒乙亥仲秋錄

蕭田水利志



序

莆田三面濱海自宋以來為田億萬沮洳斥鹵盡成膏腴陂隄瀦蓄之為功大也余奉檄權守興安下車即詢郡邑水利時有以東角隄壞呈請脩治告者查東角當海潮之衝隄為保障關係尤鉅委員履勘地勢遼濶舊址半就傾圮徧詢當時工作成規無一知者正苦無成迹可循也訪聞邑紳陳春溟大令曾手輯莆陽水利志亟向其家取而讀之志分八冊冊各

莆陽水利志

卷一

數萬言昔太史公讀瓠子歌知水之為利害而作河渠書九州水道一目瞭然春溟此志雖志一方水利非熟悉水之利害而能如是之詳且盡耶惜乎僅存稿本不無剝蝕之虞而猶幸稿本尚存俾官斯土者可藉以稽成迹而資則倣也擬壽梨棗以垂久遠商之紳士林方伯岵瞻及興糧通判楊運丞壽農咸以為然余與運丞各捐廉助刊焉惟稿本傳鈔亥豕魯魚多所不免校對之役所望於春溟先生之後人至

其採輯博洽洪纖畢舉閱者自識之不復贅述將付梓為誌其緣起如此

光緒元年歲在乙亥八月上澣福建補用道署興化

府事楚北陳懋烈撰



序

蓬巷掘門甕牖捲樞之士囿於耳目之所見故鄉邱壑茫然莫辨其無足傳信也固宜乃一二淹博通才於生長之區記載亦缺焉從略甚矣著述之難而沿流討源之尤非易事也莆邑當下游要衝傍溪滕海受永春德化仙遊三百六十澗之水分別流派以資灌溉莆民安居仰賴食其利而莫知所由興獨春溟陳大令負一邑

衆望慨然以修廢興頽為已任填築磯堤疏通涵竇工程諳熟累著成效所撰有莆田水利志一書條分縷析取前人傳記類附其下而木蘭陂以曾奉委任督修其成功難者其立言倍切故是書於陂事獨詳夫士君子得尺寸之柄於閭閻義舉稍有所濟輒能致衢歌巷誦傳播不衰矧開渠築堰挹彼注茲使膏腴數十萬畝不至有旱乾水潦之虞而又考前言抒已見筆於

書以示來者其功德所及可限量歟不濟一時
當濟一方非得范文正公之遺意歟鄉先生歿
而可祭於社者不在斯人其誰歟余自癸亥迄
丙寅兩權興篆雖不及見大令之面而年來修
瀨溪橋木蘭陂頽址探討詢問於大令之功之
嘖嘖人口者耳熟能詳今臘余將返泉任迫於
瓜代之期其孫奮孫係郡試所取士以是書請
序於余余既深悉大令之殫心瘁力大有造於

蒲尤望其孫克繩祖武讀是書而穆然於弓冶
箕裘之舊以世守不替也是為序

賜進士出身知興化府事前陝西道監察御史金華

章倬標拜撰



序

天地有自然之利不知所以裁制之則利不興即知所以裁制而不得其人與不得其法以區畫之則利仍不興顧法因人而立利以法而成是非筆之於書則人往而法亦隳泐而利亦廢欲求其歷久而不變也難已莆邑地處下游幅頓遼廓然皆傍山陞海土性鬆浮十日不雨則苦旱五日淫霖則苦潦不有陂隄之蓄洩則乾澇悉聽諸雨暘甚非便民之道此

春濱陳大令所為汲汲以興修水利為要圖而亟思立言以垂永久也余以丁卯冬來守荔城適前任

白海仙先生議修新豐永豐二埭旁及江口頂岑頭宗祥子獻卓埭溪仔各埭海隄工程未竟遽歸道山余莅任伊始即接手興修幸於次年秋一律告竣今復擬勘修東角遮浪顏趾採訪所及被大令之澤者咸嘖嘖稱誦弗哀所謂功德在人梓桑矜式者非耶抑余聞之莆邑水道發源於永春德化僊游三州縣

滙三百六十澗之水以注於海昔人於木蘭山下建
陂築隄分流別派以資南北洋田疇之灌溉厥利甚
溥特歲遠年湮漸即頽圯而大令獨慨然興修復之
思始修南安太平二陂繼復奉委督辦木蘭要工竭
慮殫精不擾而事集且出其緒餘輯古近成效纂甫
陽水利志八卷縷晰條分瞭如指掌俾資官斯土者
之攷鏡烏虜大令之用心亦良苦矣夫農先八政所
望其致力田功民有四生莫重於興修水利古之陂

渠溝洫澮遂瀦防各載其名垂為良法簡策昭昭固
可考已今觀是書深切著明委曲詳盡洵足攷成憲
而垂永圖守土者誠取而觀之亦治蒲之一助也令
姪問序於余余既嘉大令之垂法以利民且以得睹
斯編為快不敢以不文謝爰贅數語弁諸簡首是為
序

己巳仲春津門蓉軒張夢元



序

自古賢知之士為民捍患興利其遺迹往往而在余守興安四閱月值亢旱親赴各鄉勘水道至木蘭陂見陂隄井水循故道詢諸父老咸嘖嘖頌陳大令功德不衰心竊佩之越數日邑中廣文陳君清傑以莆田水利志來曰願為之序余發書觀之分圖說水道陂塘隄防祠祀章奏公牘傳記八門文凡十數萬其作而名者即春溟陳大令也范文正公謂滕

子京百廢具舉建隄其一也夫隄不建則水不理水不理則田不利而大令以修廢興類為己任築隄以資田疇之灌溉且恐其事之久而湮也筆之於書以為後世法民到于今受其賜嗚呼大令莆人略施其餘以利及物遂大有造於莆使當時得顯用之其造福於蒼生者可以數計哉至水利之源委與修隄之始終條分縷晰具詳於書毋須余多贅贊也大令文孫茂才名奮孫余課興安書院所取士也詩

有之昭茲來許繩其祖武余既景慕 大令之功尤
厚望於其孫也夫是為序

同治八年十二月朔旦

賜進士出身知興化府事前禮部郎中乙丑會試同
考官記名御史翰林院庶吉士東萊林慶貽拜撰



白叙

莆田介福泉之間西北依山厥田環山傍溪東南距海厥田背山懸海其中延壽木蘭二溪與海潮相出入鹽淡不分沙泥膠成平壤短長相覆將四十里惟蒲生之謂之蒲田後乃去水爲莆焉唐長官吳興始隄延壽杜塘而開北洋觀察使裴次元復隄東角遮浪而開南洋延壽之築瀦溪水通溝東角之築以之障潮緒潦水於塘而已宋岐王陳洪進陂南安知軍劉諤陂太平皆遏北菽蘆溪之水一漑九里洋在北洋之北一漑興教里環山之田餘流入北洋之溝又延壽之上截爲使華陂漑尊賢里高地至宋熙

甯間侯官長者李宏乃奉詔陂木蘭以漑南洋蓋功之成最難故築最多而灌田最多元總管郭朶兒張仲儀分之以濟北洋而下延壽水於望江自是舟楫相通田疇相望風景不亞江南明初江夏侯周德興以平海莆禱備倭築城而拆東角遮浪石隄隄僅土築潮乃爲患加之溝渠湮塞涵竇走漏雖逐時補救然漸失前人遠大之謨矣嘗謂莆之水利始於唐盛於宋大備於元至明而壞以迄於今詎可緩圖者池養服官畿輔道光元年奉外諱旋里爲鄉人修太平南安二陂太平之陂竭慮爲之南安則僅能了事復砌杭頭之隄值總督孫文靖公堅意興修木蘭水利

府廳縣稟奉委任於是修陂濬渠築堰建塘填磯經理南洋凡四歲淘溝障溪整頓北洋逾一載蓋自道光六年至十年糜制錢十數萬鎰得觀厥成苟非持以大力及時而爲則溪水不入溝海潮屢上田膏腴不仍爲棄地耶厥後東角遮浪磊水埤搜漏穴寶勝溪障兩岸挖沙石延壽屢設防旁及新浦西利下江頭之泄下江頭橋堦之圍而難緩當圖者則南洋之橫山北洋之荔浦月峯亟宜填磯又南洋溪泉頭以下北洋南箕以下凡十數處應填又東角之東宜接築石隄址以亂石遮浪之西宜接築石隄又東山土名龍脰地面宜隄以石又南洋上段溝宜再濬以所

挖沙石堆田爲圍將來得仿照辦理并修中段下段之溝淤於澗者計護磯添隄開溝工僅前十二稅畝不足則募之然無堅持於上者何由得成此池養所爲恨其事之不終而嘆其年之已老也夫水動物也久則必變變不爲利必爲害得人而後能去其害永其利竊欲輯古近成迹資後來採擇時福建通志開局道光十一年入局分纂得多見古書凡涉莆田水利逐加考證中如劉後村尚書之文詞古雅周翠渠方伯之稽載精審藉以沿源而討流圖度咨詢所及間附辨論纂成莆田水利志委曲詳盡繁而不殺今秋上省回莆道中以書自隨悉心檢點因而芟支

蔓省繁複所錄前人文字或篇去其段其句或句減其字
然不敢窳易加增失傳信之義志分圖說水道陂塘隄防
祠祀章奏公牘傳記八門文凡十數萬良有司誠取而觀
之亦可知水利之關係莆田勦修不易而加意修葺矣若
孫文靖公之大有造於我甬東角已建廟所當呈官

奏請

朝廷俎豆千秋不宜如郭張二公之功在北洋不知所報且久
而忘之也書成二十年乃自刪定因弁以叙咸豐元年冬
十月既望莆田陳池養



莆田水利志卷一

陳泚養編



圖說

水道

陂塘

溝渠斗門涵洞附

隄防

祠祀

章奏

公牘

傳記

雜識附

莆陽水利志

卷一

三

凡例

一書志水利故於水特詳而山從畧

一莆田水利莫大於南北兩洋瀨溪匯永春德化仙遊三州縣諸水至城西南十里木蘭山下截爲陂專溉南洋兼及北洋其利最溥故首及之漁滄溪匯仙遊興泰里莆田常泰里諸水至府城北七里延壽村引溉北洋故次及之其上流截爲使華陂溉尊賢里沿山高地附焉北菽蘆溪在府東北山內匯廣業里諸水先截爲太平陂漸興教里沿山高地餘流入溝助溉北洋下流爲迎仙溪於江口山內截爲南安陂溉

九里洋以次而及其溝圳斗門涵洞各附本陂之下
一雜陂埧先溪頂及南洋沿山以其水入木蘭溪或入南洋之溝也並及壺公山南醴泉忠門平海以其毗附南洋也次及附城及城東北沿山以水入北洋之溝也次及常泰里山內則延壽陂上流也次及廣業山內並及待賢待賓二里沿山而境內之水利畢舉矣所載沿原達委可溯流而知陂埧所在其曾經爭競者詳稽本末以備考證

一南北二洋及九里洋俱係睦海爲田隄防最要東角遮浪尤當東北海潮之衝關係全洋農田民居此次

孫文靖以大力造隄爲莆百世利故詳志本末

一本蘭陂李長者錢女延壽陂吳長官太平陂劉曾諸公俱有廟邀

朝廷祀典南安陂陳岐王方纁使黃方伯亦有廟民間私祭惟張郭二公分木蘭以溉北洋通舟楫功德甚鉅數百年未議酬報實爲缺事又東角遮浪於明代建廟祀黃譚二公未幾而頽今於道光七年建塘民免潮患安居耕種二十二年始於東角村內建崇報祠擬祀孫文靖公及巡撫韓公太守徐公署通判袁公知縣王公委員陸公其後廳祀唐裴公明黃譚二公

莆陽水利志

卷一

十四

國朝太守蘇公以昭酬報惟孫文靖公爲功最大宜公懇奏請

祀典以垂久遠

一此次條濬建築工程重大用是全載章奏畧收文檄俾後來得有所考又太平南安修陂文卷亦附載一前人傳記全錄不致遺佚間有刪削然不敢塗改增添一字

